

समे .1815

<><><><><><>

Headlines

1. उपराज्यपाल मनोज सिन्हा होरें आखेआ जे मनुक्खता दे भविक्ख गी नमां आकार देने च नारी शक्ति दा योगदान बड़ा मता ऐ।
2. जम्मू कश्मीर विधानसभा च अज्ज बजट पर आम चर्चा कीती गई।
3. ग्रामीण विकास मंत्री होरें आखेआ जे जम्मू कश्मीर च प्रधानमंत्री आवास योजना ग्रामीण तैहत 4 सौ 98 लाभार्थीएं गी घरें दे निर्माण लेई 5-5 मरले जिमीं अलाट कीती गई ऐ।
4. मंत्री सकीना इत्तू होरें आखेआ जे जम्मू कश्मीर च 9 कलोनिएं दी स्थापना लेई 1 ज्हार 298 कनाल ते 28 मरले जिमीं दी शिनाख्त कीती गई ऐ।
5. सेहत मंत्री होरें आखेआ जे सरकार सेहत सरबन्धी सुविधाएं गी होर मजबूत बनाने लेई कम्म करा'रदी ऐ।

<><><><><><>

IWD-LG

जम्मू कश्मीर केन्द्र शासित प्रदेश च अज्ज अंतर्राष्ट्रीय महिला दिवस बड़ी धूमधाम कन्नै मनाया गेआ। उपराज्यपाल मनोज सिन्हा होरें बुद्धा आर्ट एंड पेंटिंग आस्सेआ गांधी नगर आले पद्मश्री पदमा सचदेव सरकारी महिला कालेज दे सैहयोग कन्नै आयोजित "सशक्त नारी सम्मान" कार्यक्रमे च हिस्सा लैता। अपने संबोधन च उपराज्यपाल होरें अंतर्राष्ट्रीय महिला दिवस पर संगठने महिलाएं गी दिली मुबारकबाद दिक्ती। श्री सिन्हा होरें गलाया जे मनुक्ख जाति दे भविक्ख गी नमां आकार देने च नारी शक्ति दा योगदान बड़ा मता ऐ। उनें आखेआ जे कुदरत नै महिलाएं गी रचनात्मकता ते समाजी बदलाव दा इक विशेष तोहफा दिक्ते दा ऐ.....

<><><><><><>

IWD

अज्ज अंतर्राष्ट्रीय महिला दिवस ऐ। हर ब'रे 8 मार्च गी एह ध्याड़ा महिलाएं लेई समाजी बरोबरी, उंदे अधिकारें ते उपलब्धिएं गी सम्मान देने लेई मनाया जंदा ऐ। एह ध्याड़ा समाज च महिलाएं दी भूमक, संघर्ष ते कामयाबबएं गी दर्शादा ऐ। इस ब'रे लेई अंतर्राष्ट्रीय महिला दिवस दा विषय सार ऐ "सबबने महिलाएं ते कुड़िएं लेई अधिकार, बरोबरी ते सशक्तिकरण। उपराज्यपाल मनोज सिन्हा ते मुखमन्त्री उमर अब्दुल्ला होरें अज्ज अंतर्राष्ट्रीय महिला देश दे मौके पर लोकें गी बधाई दिक्ती। देश ते दुनिया दे बाकी हिस्से आला लेखा जम्मू खित्ते च बी एह ध्याड़ा बी बड़ी धूमधाम कन्नै मनाया गेआ। इस मौके पर जम्मू, डोडा, राजौरी, पुंछ, कठुआ, उधमपुर, किश्तवाड़ ते होरने क्षेत्रें च बक्ख-बक्ख कार्यक्रमें दा आयोजन कीता गेआ जेहदे च समाज च महिलाएं दे योगदान गी सम्मानत कीता गेआ।

<><><><><><>

IWD-Res Common

“हैलो जेएंडके” नां दी पैहलकदमी दे बैनर हेठ जम्मू कश्मीर रैसीडेंट कमीशन आस्सेआ अंतर्राष्ट्रीय महिला दिवस बड़े मते उत्साह कन्नै मनाया गेआ। “एक्सरलेट एक्शन” दे विषयसार कन्नै आयोजित कार्यक्रम च लैंगिक समानता दी लोड़ दे कन्नो कन्नी महिला सशक्तिकरण दे प्रति वचनबद्धता गी होर दृढ़ करने दी जरूरत पर जोर दित्ता। इस मौके पर बोलदे होई प्रिंसिपल रैसीडेंट कमीशनर डॉ. रश्मि सिंह होरें रैसीडेंट कमीशन ते डासरेक्टोरेट च महिला कर्मचारिएं दे योगदान गी उजागर कीता। उनें सब्बने महिलाएं गी समर्थन देने दी सरकार दी प्रतिबद्धता गी बी उजागर कीता।

<><><><><><>

Women Achiwers Udhampur(byte)

उधमपुर जिले च महिला आत्म निर्भर ते सशक्त बनियै कामयाबी दी नमीं कहानी लिखा'रदियां न। केन्द्र सरकार आस्सेआ चलाई जा'रदी बक्ख-बक्ख पैहलकदमिएं ते योजनाएं दा लाह ठोआइयै एह महिला अपने हुनर विकास च बाद्धा करियै सशक्त बना करा'रदियां न। उेसी गै इक महिला न-ज्योति देवी जेहड़ी उधमपुर दे बट्टल बालिया ग्रां दी रौहने आलियां न। ओह मकामी महिलाएं लेई कामयाबी दी इक मिसाल बनी गेइयां न। उम्मीद स्कीम तैहत आप सहायता समूह राएं उनें छड़ा इक कारोबार गै नेई खड़ेरेआ सगुआं एहदे कन्नै अपने खित्ते दियां 12 होरनी महिलाएं गी बी कम्म रोजगार दित्ता ऐ। अपनी सफलता दी कहानी आकाशवाणी समाचार कन्नै सांझा करदे होई ज्योति देवी होरें आखेआ

तोआई उधमपुर दियां डिप्टी कमीशनर सलोनी राय होरें उधमपुर जिले दी महिलाएं दी सफलता गी उजागर करदे होई आखेआ

<><><><><><>

IWD Sahitya Academy

डोगरी दी नामवर लखारी, अनुवादक ते शिक्षाविद प्रो. अर्चना केसर होरें गी साहित्य अकादमी अवार्ड कन्नै सम्मानत कीता गेआ ऐ। एह सम्मान उनेंगी भीष्म साहनी हुंदे मशहूर हिंदी नावल “तमस” दे डोगरी अनुवाद लेई दित्ता गेआ ऐ। प्रो. अर्चना केसर होरें हिंदी दे इलावा केई पंजाबी, उड़िया ते अंग्रेजी कताबें दा बी डोगरी च अनुवाद करी चुकी दियां न। भारत दे संविधान दा डोगरी च अनुवाद करने च उंदा टकोहदा योगदान रेहा। ओह उस अनुवाद पैनल दियां कन्वीनर हियां। एह सम्मान थोने पर आकाशवाणी समाचार कन्नै खास गल्लबात करदे होई प्रो. अर्चना केसर होरें आखेआ

<><><><><><>

Girl Cricketers Poonch

बन्ने कन्नै लगदे पुंछ-गुरकीरत कौर, विशाखा केसर ते असमा चौधरी होरें प्रतिष्ठित बीसीसीआई नैशनल क्रिकेट प्रतियोगिता दा प्रतिनिधित्व करियै खित्ते दा नां रोशन कीता ऐ। उंदे हुपर, लगन ते मेहनत करी उनें राष्ट्रीय सतह पर एह मुकाम हासल कीता ऐ जेहड़ा केइए कुड़िएं गी अपने सुखने पूरे करने लेई प्रेरित करदा ऐ। इस मौके पर आकाशवाणी समाचार कन्नै गल्ल करदे होई गुरकीरत कौर होरें आखेआ

<><><><><><>

General Discussion

जम्मू कश्मीर विधानसभा च अज्ज बजअ 2025 पर चर्चा कीती गेई। एह बजट मुख्यमंत्री उमर अब्दुल्ला हुंदे आस्सेआ कल विधानसभा च पेश कीता गेआ हा। बजट पर चर्चा दी शुरूआत करदे होई जावेद हुसैन बेग होरें इस बजट दा परा पराता दृष्टिकोण पेश करदे होई इसी संतुलित बजट करार दित्ता। उनें आखेआ जे एह बजट मजूदा सरकार दे भविक्ख आले राएं गी दर्शादा ऐ। तोआई तारिक हमीद कर्ग होरें आखेआ जे इस बजट च सब्बने समाजी क्षेत्रें लेई सकारात्मकता ऐ। उआं उनें आखेआ जे ध्याड़ीदारें ते आंगनवाड़ी वर्करें ते मामले खाली पेदी असाभिएं गी पूरने ते कश्मीरी पंडतें दा पुर्नवास जनेह मामले गी बजट च टकोहदी थाहर देनी लोड़चदी ही। इस चर्चा च अर्जुन सिंह राजू, तनवीर सादिक, सुनील भारद्वाज, नाजिर गरेजी, बलवंत सिंह मनकोटिया ते फारूक शाह होरें बी हिस्सा लेआ।

<><><><><><>

CM-Bishnah

मुख्यमंत्री उमर अब्दुल्ला होरें अज्ज आखेआ जे अरनिया ते बिश्नाह गी सनाखड़ा बनाने दा कम्म जिला कैपेक्स दे कम्मैं तैहत् कीता जाग, जिसलै कि साफ सफाई आला कम्म पैहले गै मुनिसिपलटिएं राएं कीता जा'रदा ऐ। मुख्यमंत्री होरें एह जानकारी जम्मू कश्मीर विधानसभा च मिंबर राजीव कुमार भगत हुंदे आस्सेआ पुच्छे गेदे पूरक सुआले दा परता दिंदे होई दित्ती। एहदे शा पैहले मिंबर होरें बिश्नाह हलके च अरनिया ते बिश्नाह गी सनाखड़ा बनाने सरबंधी इक विशेष पैकेज बारे सुआल पुच्छेआ हा।

<><><><><><>

Dar Awas Plus

ग्रामीण विकास मंत्री जावेद अहमद डार होरें अज्ज आखेआ ऐ जे जम्मू कश्मीर च प्रधानमंत्री आवास योजना ग्रामीण दी अवास प्लस श्रेणी दे तैहत् 498 लाभार्थिएं गी घरें दे निर्माण लेई 5—5 मरले दी जिमीं अलाट कीती गई ऐ। उनें इब्बी दस्सेआ जे राजस्व मैहकमे आस्सेआ 442 मामले पर गौर कीता जा'रदा ऐ। एम.वाई.तारीगामी हुंदे आस्सेआ विधानसभा च पुच्छे गेदे इक सुआला दा परता दिंदे होई मंत्री होरें दस्सेआ जे जम्मू कश्मीर च उचित मुआवजे दे अधिकार ते जिमीं हासल करने दे कम्मैं च पारदर्शिता ते परतियै बसाने सरबंधी कनून गी लागू कीता जा करदा ऐ ते इस कनून च कीते गेदे प्रावधानें मूजब गै मुआवजे दी रकम तैह कीती जा'रदी ऐ।

<><><><><><>

Itoo Townships

सेहत ते डाक्टरी शिक्षा मैहकमे दिएं मंत्री सकीना इत्तू होरें अज्ज आखेआ ऐ जे जम्मू कश्मीर च 9 कलोनिएं दी स्थापना लेई 1 ज्हार 298 कनाल ते 28 मरले जिमीं दी शिनाख्त कीती गई ऐ। मंत्री होर अज्ज विधानसभा च व्हीद—उर—रहमान परा हुंदे आस्सेआ पुच्छे गेदे इक सुआले दा मुख्यमंत्री उमर अब्दुल्ला हुंदी थाहरे पर परता देआ करदियां हियां। उनें गलाया जे प्रदेश दे लोकें दी रिहायश सरबंधी बघदी जरूरतै ते गौर योजना बद्ध ढंगै'नै शैहरे दे विस्तार गी रोकने दे मकसद कन्नै इनें कलोनिएं दा निर्माण कीता जा'रदा ऐ। उनें दस्सेआ जे जम्मू विकास प्राधिकरण आस्सेआ सरकारी जमीनें दी शिनाख्त दा कम्म कीता गेआ ऐ।

<><><><><><>

Itoo Health

सेहत ते डाक्टरी शिक्षा विभाग दिएं मंत्री सकीना इत्तू होरें अज्ज आखेआ ऐ जे सरकार सेहत सरबंधी मजूदा सुविधाएं गी होर मजबूत बनाने लेई कम्म करै करदी ऐ। उनें दस्सेआ जे जम्मू कश्मीर च बक्ख—बक्ख स्तरै पर 4 ज्हार 200 शा मते सेहत इदारे न ते प्रदेश च नमीं किस्म दे 554 प्राथमिक सेहत केन्द्र बी कम्म करे करदे न। मंत्री होरें शौकत हुसैन गनेई हुंदे आस्सेआ पुच्छे गेदे इक सुआले दा परता दिंदे होई दस्सेआ जे भारत सरकार दे सेहत ते परोआर कल्याण मंत्रालय दी रिपोर्ट मूजब सेहत इदारे दी तादाद दे स्हाबै पूरे मुख्य च जम्मू कश्मीर बड़ी उच्ची थाहरे पर ऐ। इत्तू होरें इब्बी गलाया जे उंदा मैहकमा भारत दे सार्वजनिक सेहत मानकें मूजब मजूदा सेहत सुविधाएं गी तगड़ा बनाने दे मकसद कन्नै कम्म करै करदा ऐ।

<><><><><><>

Itoo Rajouri Hospital

सेहत ते डाक्टरी शिक्षा मैहकमे दिएं मंत्री सकीना इत्तू होरें आखेआ ऐ जे लोकें दी सुविधायां लेई राजौरी आले जिला अस्पताल गी कुसै होर मुनासब थाहरे पर मुंतकिल कीता जाग। जावेद इकबाल चौधरी हुंदे आस्सेआ पुच्छे गेदे इक सुआला दा परता दिंदे होई मंत्री होरें दस्सेआ जे जिला अस्पताल राजौरी च जगह दी कमी करी अक्सर मता रश पैदा रौहदा ऐ। उनें आखेआ जे लोकें दी सुविधा लेई इस अस्पताल गी कुसै होर मुनासब थाहरे पर मुंतकिल कीता जाग। मंत्री होरें जकीन दोआया ऐ जे सरकार आम लोकें गी मयारी सेहत सहूलतां दस्तयाब करोआने लेई वचने बज्जी दी ऐ ते सब्बने सेहत ढांचे दा दर्जा बघाया जाना बी जकीनी बनाया जा'रदा ऐ।

<><><><><><>